

Nuusbrief van die Peter Henrick Henning Familiebond

Theewaterskloof Landgoed
Villiersdorp

Posbus 121
6848 Villiersdorp

Sel: 082 355 3801

www.henning.org

E-pos: olie4@henning.org

Verskyn vier keer per jaar: Februarie, Mei, Augustus en November

Henning Familie presteer Geslag na Geslag



Prof Cosmo Grenville Henning *20-4-1932 (a2.b7.c5.d7.e2.f1.) en sy vrou, Joyce (gebore Roebuck) met hul troue in 1961

In die vorige twee nuusbriewe het ons vertel van prof Cosmo Grenville Henning *20-4-1932 (a2.b7.c5.d7.e2.f1.) se akademiese prestasies, asook hy en sy vrou, Joyce (gebore Roebuck) se vier kinders, wat ook almal uitsonderlik presteer het. Drie van die vier kinders woon ongelukkig deesdae in die VSA en slegs hul tweede seun, Michael Anthony (Mike) woon steeds in Suid-Afrika, waar hy onlangs met die heel hoogste akademiese eerbetoon van die Suid-Afrikaanse Navorsing-stigting met 'n A1-gradering beloon is. Hierdie gradering word slegs toegeken aan navorsers wat internasionaal deur alle beoordelaars wêreldwyd erken word. Professor Mike is 'n wiskundige verbonde aan die Universiteit van Johannesburg.

Ons het ook reeds volledig oor Prof Cosmo se ander seun, Adrian Genville wat in die VSA woon berig en het belowe dat ons in hierdie nuusbrief volledig oor die ander twee kinders, wat beide in die VSA woon, sal vertel.

Maar kom ons begin met Prof Cosmo se ouers. Ons het net die basiese genealogiese gegewens van sy ouers gehad, maar niks van hul geskiedenis nie. Ons kon dus nou hulle prentjie ook duideliker inkleur en hoe dit inpas by hul voorsate verder terug.

Cosmo was die enigste kind van Cecil Redvers Henning wie op 18 Oktober 1900 te Aliwal-Noord gebore is en sy vrou, Sylvia Maud (gebore Rudman).



a2.b7.c5.d7.e2. Cecil Redvers Henning *18 Oktober 1900 en sy vrou, Sylvia Maud (gebore Rudman) se troue te Aliwal-Noord. Ons aanvaar dat die strooijonker, strooimeisie en blommemeisies familieleden van die bruidspaar was

Cecil Henning en sy vrou, Sylvia, was hardwerkende mense en het 'n goeie besigheidsin gehad. (Red: My pa was 'n neef van Cecil Henning en het jare gelede, met bewondering vir my vertel van hierdie neef van hom wat so 'n goeie besigheidsman was) Hulle het 'n woonstelgebou in Port Elizabeth laat bou en dit Grenville Mansions genoem, vernoem na hul seun, Cosmo Grenville Henning. Later verkoop hulle die woonstelgebou en begin in die laat veertigerjare 'n vervoer besigheid vanuit Uitenhage.



Sommige van die busse van Cecil Henning se “Henning Bus Service” by hul depot in Uitenhage.

Cecil en sy seun Cosmo het na Kalifornië, Amerika, gereis en 'n vloot GMC -busse gekoop. Die busse is deur die Port Elizabeth hawe ingevoer, maar het in baie stukke – alle onderdele apart - aangekom en sonder 'n gebruikershandleiding. Cecil moes dus slegs met sy meganiese kennis elke bus met die hand aanmekaar sit. Dit is hoe Henning Bus Service tot stand gekom het.

Die busdiens het Uitenhage, Redhouse, Despatch en Port Elizabeth bedien. Busse het altyd gewag by die Uitenhage -treinstasie en dorpe waar die trein gestop het, soos Swartzkop -



Een van die busse van Henning Bus Service van Uitenhage

gebore 21 Maart 1867 en sy half niggie Susanna Magdalena Henning (a2.b7.c8.d10.) (**Hulle vaders was halfbroers - dieselfde vader, dog verskillende moeders. Susanna Magdalena Henning was 'n jonger suster van Bondsekreteraris Olivier Henning se oupa).**



a2.b7.c5.d7. Pieter Barend Henning *21-3-1867, sy vrou a2.b7.c8.d10. Susanna Magdalena (gebore Henning) *14-4-1874 en hul drie kinders , Mabel *1899, Cecil Redvers *18-10-1900 en Florence Muriel Beatrix *6-3-1909

stasie, wat 'n belangrike stop vir Johannesburg en sommige van die oostelike voorstede van Port Elizabeth was. Die onderneming is jare lank suksesvol bedryf onder die eienaarskap en bestuur van Cecil en Sylvia en is beskou as die eerste busdiens in Uitenhage. Hulle het die busdiens uiteindelik in die laat 1960's verkoop.

Cecil was die seun van a2.b7.c5.d7. Pieter Barend Henning,

Voor Pieter Barend – en Susanna Magdalena Henning se troue woon hy by sy ouers op hulle plaas Ezelshoek in die Cradock distrik en sy op haar ouers se plaas, Damfontein, distrik Aliwal-Noord. Na hulle huwelik woon hulle 'n ruk lank in die Aliwal-Noord distrik. Kort na die Tweede Vryheidsoorlog 1899 - 1902 koop hulle egter die plaas Sunnydale in die Rouxville distrik, waar hulle 'n welvarende boerdery opgebou en tot en met hulle dood gewoon het. Hulle was dus tipiese Noord-Oos Kaap Afrikaner boere.

Prof Paul Roebuck Henning

Paul Roebuck Henning, gebore 9 April 1963 is die oudste kind van Prof Cosmo Henning en sy vrou Joyce. Soos sy pa het hy ook uitgeblink op akademiese gebied. Paul is Mede-Professor in Noodgeneeskunde by die Universiteit van Suid-Alabama in die Verenigde State van Amerika. Hy tree ook op as Mediese Direkteur by die "Orange Beach Fire Department".

Sy pa het hom reeds in die 1980's beïnvloed om sy kwalifikasies in die VSA te behaal, omdat hy toe reeds voorspel het dat dinge in Suid-Afrika baie gaan versleg. Paul het dus by verskeie universiteite in die VSA aansoek vir toelating gedoen. Weens die verswakkende waarde van die Rand was meeste onbekostigbaar, maar hy is in 1986 by die Universiteit van Suid-Alabama in Mobile aanvaar om 'n Baccalaureus graad in



a2.b7.c5.d7.e2.f1.g1. Prof Paul Roebuck Henning, gebore 9 April 1963

Natuurwetenskappe, met paramediese studies te volg. In 1988 behaal hy die graad Baccalaureus in Natuurwetenskap (B.S) cum laude.

Hierna slaag hy in die kwalifiserende “EMT-Paramedics” eksamen in Alabama. Tydens sy voorgraadse studies het hy saam met Newmans Ambulance in Mobile, Alabama gewerk, totdat hy as paramedikus gegradueer het. Hy word toe as brandmedikus aanvaar en werk vanaf 1989 saam met Prichard Brandweer. Hy ondergaan verdere opleiding by Tuscaloosa Fire College.

In 1990 word hy oorgeplaas na Mobile Fire Rescue (MFR) en voltooi bykomende opleiding vir brandweerskole. Hy het tot 1992 as paramedikus en brandweerman gewerk. Tydens sy diens by MFR het hy in 1990 vir 'n M-graad (M.Sc.) ingeskryf en sy studies in 1992 voltooi met hoofvakke Biochemie en Fisiologie. In 1992 word hy by die St George's University School of Medicine (N.Y) aanvaar. In 1996 behaal hy sy doktorsgraad in geneeskunde (MD).

In 1995 word hy 'n Amerikaanse burger en word in 1997 aanvaar vir spesialisopleiding in noodgeneeskunde aan die Weill Medical University-Cornell, N.Y. Na vier jaar kwalifiseer hy as 'n spesialis in noodgeneeskunde.

Hy is in 2002 'n akademiese pos aan die Universiteit van Inselspital, Bern, in Switserland aangebied as Noodoperasie-behandelende geneesheer. Hy bedank in 2005 en keer terug na die VSA.

Hy werk vir agt maande in Redding, Kalifornië en skuif daarna na die Sacred Heart Hospital, Pensacola, Florida as handelende geneesheer in noodgeneeskunde. Hier werk hy tot 2018. Hy is ook aangestel as kliniese assistent-professor in noodgeneeskunde by die Florida State University (FSU) waar hy in 2017 bevorder word tot kliniese medeprofessor.

Afgesien van die Sacred Heart Hospital, is hy in 2015 aangestel as mediese direkteur vir openbare veiligheid vir Escambia County, mediese direkteur van Pensacola Fire Department en Medical Director vir Escambia Corrections.

In 2018 bedank hy om voltydse noodgeneeskunde aan die Universiteit van Suid-Alabama aan te bied. Sy posbenaming: Programdirekteur en medeprofessor van die Opleidingsprogram vir noodgeneeskunde by die Universiteit van Suid-Alabama.

Paul is 'n genoot van die American College of Emergency Physicians (FACEP) en 'n genoot van die American College of Academic Emergency Physicians (FAAEM). Hy is ook 'n lid van die American College of Health Care Executives (ACHE).

In 2002 besoek hy Rusland en trou op 19 Februarie 2002 te Saratov, Rusland met Ekaterina Kosmaenko. Paul en sy vrou, Ekaterina het met hul terugkeer na die VSA hulle huwelik op 15 April 2002 te Little Rock, Arkansas herbevestig.



a2.b7.c5.d7.e2.f1.g4. Dr Susan Claire Kelmanson (gebore Henning) *24-12-1972 en haar twee kinders, Victoria Evelyn Kelmanson *26-2-2002 en Andrew Ross Kelmanson *16-7-2004

Dr Susan Claire Kelmanson (gebore Henning)

Haar noemnaam is Kate. Sy is op 24 Desember 1972 te Pretoria gebore. Soos haar pa en al drie haar broers het Kate ook uitsonderlik op akademiese gebied presteer. Sy het ook soos haar oudste broer kort nadat sy skool verlaat het, na die VSA verhuis en al haar kwalifikasies daar behaal. Kate is 'n doktorsgraad gekwalifiseerde psigiater. Sy werk voltyds by die Gulf Breeze Recovery Centre wat 'n herstelsentrum vir verslaafde pasiënte is. Sy is egter ook in privaat praktyk.

Ons haal haar kwalifikasies in Engels aan omdat almal in die VSA verwerf is:

MS, LMHC, MCAP, MD, PhD

MD Saratov Rusland (Psigiatrie); M.Sc. in Mental Health Counseling; LMHC - Licensed Mental Health Counselor; MCAP - Master Level Certified Addiction Professional; PhD - Advanced Studies in Human Behavior; NLP Master and Practitioner; Founder of Rapid Transformational Recovery Program.

KykNET TV-Reeks - Voetspore: Suid-Afrika

Johan Badenhorst, die aanbieder van die Voetspore: Suid-Afrika program, wat op KykNET uitgesaai word, is besig met die beplanning en voorbereiding vir sy volgende toer, waar hulle 'n TV-reeks van die Wilde-Kus en die Suidelike Drakensberge gaan maak.

Hy is tans besig om interessante plekke te identifiseer, wat by hierdie toer ingesluit sal kan word. In die episode wat gedurende die eerste week van September 2021 uitgesaai is, het hy onder andere by die plaas van Gerrit Henning en sy vrou Mariaan in die Rhodes-distrik aangedoen om beeldmateriaal wat hulle sal kan gebruik, te identifiseer. In die program wat op TV uitgesaai is, is die naam van Gerrit Henning se plaas nie genoem nie.



Johan Badenhorst aanbieder van die Voetspore, Suid-Afrika program op KykNET ontmoet Gerrit en Mariaan Henning op hul plaas, Mertoun in die Rhodes distrik

Met die kennis wat die uwe (Olivier Henning) van die Hennings en hul plase hier in die Drakensberge het, het hy onmiddellik Gerrit Henning identifiseer as a2.b7.c8.d5. e2.f1.g3. in die Henning Familiiekroniek en dat hy die eienaar van die plaas Mertoun (uitgespreek Martin) is.

Die eerste eienaar van hierdie plaas was Gerrit se oupagrootjie, a2.b7.c8.d5. Gert Frans Henning, gebore 10 September 1864. As 'n jongman het grootoupa Gert in die 1880's

die plaas Mertoun gekoop en begin bewerk. Sy verhaal kan in die Henning Familiiekroniek opgelees word. Gert Frans se tweede seun, Hendrik Joachim, gebore 5 Februarie 1892 het hierna die plaas geërf en na hom sy enigste seun – ook Gert Frans, gebore 3 Februarie 1925.

Hierdie Gert Henning is gebore en het groot geword op Mertoun in die Rhodes distrik. Na sy huwelik boer hy en sy vrou op Mertoun. Hierdie plaas is in die Suidelike Drakensberge en slegs 10 kilometers van die Lesotho grens. Die harde koue winters met swaar sneeu, veldbrande, veediefstal en swak infrastruktuur, het hulle ook maar, soos hul voorsate gebrei om geharde en gesoute landbouers te word. Gert was ongelukkig die laaste 10 jaar van sy lewe nie baie gesond nie en sterf na 34 gelukkig getroude jare. Sy vrou, Stella Desire Herselman was wel gebore as 'n Herselman, maar haar ma sou ouers was beide Hennings, nl. a2.b7.c5.d7. Pieter Barend Henning en sy niggie a2.b7.c8.d10. Susanna Magdalena Henning.



Eerste eienaar van die plaas Mertoun, b7.c8.d5. Gert Frans Henning *10-9-1864, sy vrou Susannah Catharina (Sannie) (gebore Maartens) en die eerste agt van hulle elf kinders. Heel agter: e1 Olivier Johannes (Tok) *16-4-1890. Middel: e4. Adriaan Lourens (Adriaan) *4-11-1895, vader Gert, e3. Gert Frans (Frans) *9-1-1894, e2. Hendrik Joachim (Hendrik) *5-2-1892. Voorste ry: e6. Robert Mathys Daniël (Bob) *22-6-1900, e7. John Brown (John) *17-8-1902, e8. Elizabeth Magdalena (Bettie) *29-9-1904, moeder Sannie. Heel voor: e5 Filipe Daniël (Daantjie) *7-5-1898



Stella Henning *4-2-1933 ma van Gerrit Henning wat tydens haar man se siekte self die boerdery op Mertoun moes behartig

Toe ontmoet sy vir Gert Henning (a2.b7.c8.d5.e2.f1.) van Rhodes en daarmee kry sy haar derde genealogiese nommer in die Henning geslagsregister.

Stella was 'n vrou uit een stuk. Vir lang rukke, terwyl haar man ernstig siek was en al haar seuns besig met Nasionale Diensplig in die Weermag, moes sy vrou alleen die boerdery behartig. Stella was baie kunssinnig. Sy het graag geskilder en het houtsneewerk gedoen. Sy het graag gesing en was baie lief vir musiek.

Na die afsterwe van Gert gedurende 1987, het Stella na Barkly-Oos verhuis, terwyl hul jongste seun Gerrit op Mertoun gaan boer het. Die nag van 2 Oktober 1998 word Stella in haar huis in Barkley-Oos deur 'n swart booswig vermoor wat slegs haar TV kom steel het.

Die plaas Mertoun het egter ook vir my (Olivier Henning) en my broer en susters en neefs en niggies (kinders van a2.b7.c8.d8.e5 Vincent (Bill) Henning *1911 besondere betekenis. My pa en sy twee broers moes as jong manne die boerdery op die plaas Damfontein in die distrik van Aliwal-Noord oorneem, omdat hulle pa op nege-en-veertigjarige leeftyd, gedurende die 1918 Spaanse Griep Pandemie gesterf het. Hulle ouderdomme was op daardie stadium 14, 10 en 7 jaar onderskeidelik.

Toe slaan die groot en vernietigende droogte in die vroeë 1930's toe. Teen 1933 kon hulle nie meer 'n bestaan maak nie en word daar besluit dat die oudste seun, Stanley *1904 op Damfontein sal aanbly, terwyl Leonard *1908 en hul jongste broer, Bill *1911 met die veë wat hulle nog oorgehad het sal gaan soek vir weiding in die Drakensberge.

Hul neef, Hendrik Joachim (Hendrik) Henning (oupa van Gerrit Henning) van die plaas Mertoun, Rhodes het tot hul redding gekom en weiding en water vir Leonard en sy broer Bill se veë gegee. Na die droogte gebreek is, het Bill self vir hom 'n plaas net anderkant die Drakensberge in die Pitsing gedeelte van die Macleardistrik aangeskaf. Vanaf Rhodes vat mens die pad oor die Naudesnekpas – die heel hoogste bergpas in Suid-Afrika tot in die Pitsing. Leonard het egter teruggetrek na Aliwal-Noord toe.

Ons sien met groot afwagting uit om te sien wat se beeldmateriaal Johan Badenhorst en sy span vir ons gaan wys, as hierdie reeks gebeeldsend word .

Nuus van Henning nasate by die Noordpool en die Suidpool

Ons het al telkemale berig oor emeritus Ds Bjarne Fowels van Hjelmeland in Noorweë. Hy is 'n agterkleinkind van a2.b7.c8.d1. Martha Johanna Elizabeth Henning *26-8-1857 (getroud Zurich) en baie trots op sy Suid-Afrikaanse Henning voorsate al woon sy familie reeds meer as honderd jaar lank in Noorweë. Sy familie en vriende het hom die bynaam, Biff gegee.

In die vorige Ons Haantjie nuusbrieff (nr 147 van Augustus 2021) het ons 'n artikel gedra oor die pad wat wyle Pierre Henning (a2.b1.c6.d3.e11.f2.g3.) saam met verskeie geliefde Afrikaanse sangers gestap het en die positiewe rol wat hulle in sy lewe gespeel het. In reaksie op hierdie artikel het Ds Biff Fowels vir ons laat weet dat hy na hierdie sangers op U-Tube gaan luister het. Ons plaas sy brief in Engels, soos hy dit geskryf het:

"Thanks for the special edition of Ons Haantjie. In the article some musicians are mentioned. Interesting that these melodies and sometimes also the text are on YouTube. Thus I could listen to Olaf Andresen (a very Norwegian/Danish name). His "Heidelied" and "My hart verlang na die Boland" (uit de operette "Heiden orientjie" en "Hoor my Lied" are found on YouTube, played by militêre orkes. Also "Brief aan Mannetjies Roux", by Laurika Rauch (1990), - also with text. Koos de Plessis had a beautiful voice, which one can listen to. And Lucas Maree. In this way my Afrikaans family fill my house in Norway with music worth listening to, and the distance between South and North, and then and now is wiped out!"

Dit is aangenaam om te verneem dat ons geliefde sangers ook daar ver in die Noorde van die aardbol geniet en waardeer word.

Dit bring ons by Ds Biff se seun, Brynjar wat 'n geneesheer in die Noorweegse weermag is. Hy is vroeg in 2021 aangewys om as geneesheer en tandarts te dien by die Noorweegse navorsingstasie, Troll by die Suidpool.



Dr Brynjar Fowels-Landmark links met die beroemde Suiderligte by die Suidpool in die agtergrond. Regs 'n pragtige foto van die uitspanseel soos gesien vanaf die pool

Daar van die Suidpool af is Brynjar en Bondsekreteraris Olivier Henning bykans daaglik deur middel van whatsapp met mekaar in verbinding. Brynjar laat weet dat dit 'n interessante ondervinding is om die verandering van die seisoene te ervaar. Hy sê dat mens werklik kan voel hoe die aardbol kantel. Wanneer winter naderkom word die dae natuurlik korter. Vir 'n paar dae sien hulle die son net op die horison en dan is dit vir drie maande net nag met die sterreheemel wat indrukwekkend helder is. Temperature van tot minus 60 grade C word ervaar.

Hy vertel ook dat Suid-Afrika se Antarktiese navorsingsprogram in 1911 begin het toe die Suid-Afrikaanse regering 'n skenking van £25 aan Robert Falcon Scott se ekspedisie gemaak het, om wetenskap te bevorder. Daarna het Suid-Afrika die ou Noorweegse navorsingstasie oorgeneem en dit die naam SANAE gegee. Voor die oornamen moes die Noorweërs selfs hulle sleehonde Afrikaans leer met woorde soos "Trek!" om te begin beweeg en "Hookai" om te stop, wat die oornamen suksesvol laat afloop het.



Henning familie tydens die troue van a2.b6.c1.d3.e5.f3.g10.h2.i3. Mieke Henning *1-10-1994. V.l.n.r. Marina Botha (gebore Henning) *24-11-1955, suster van Maarten; Maarten Henning *22-10-1959 pa van Mieke; Mieke en Wicus Swiegers; Maarten en Marina se ma Delilah (weer getroud Matthews); Amelia Henning (gebore Krige) ma van Mieke

Huwelike

b6.c1.d3.e5.f3.g10.h2 Maarten Henning *22-10-1959 en sy vrou Amelia Jacoba (Krige) van Stellenbosch het vir ons laat weet dat hul dogter, Mieke, gebore 1 Oktober 1994 op 26 Julie 2021 te Alte Kalköven, Namibië getroud is met Wicus-Willem Petrus Jacobus Swiegers *Keetmanshoop 24-7-1994.

Mieke en Wicus was geruime tyd al verloof. Sy het op daardie stadium kontrakwerk in Namibië gedoen en kon nie haar werkspermit hernu kry nie. Hulle besluit toe om in die hof te trou om die probleem op te los en dan later wanneer die Covidpandemie verby is, 'n groot troue te hou.

Al die familie en vriende sê toe vir hulle dat so 'n troue in 'n hof darem net eenvoudig te onpersoonlik en koud is en dat almal maar van Stellebosch af sal opry na Alte Kalköven in Namibië. Op die ou einde word 'n hele fantastiese troue in twee weke gereël!

'n Dag voor die tyd laat weet die dominee wat van Windhoek sou kom dat hy weens die Covid regulasies nie uit Windhoek mag ry nie en hy gaan ook nie 'n wit leuntjie vertel om 'n permit te kry nie.

Gelukkig kry Mieke se ouers toe op die nippertjie 'n predikant in Keetmanshoop wat 'n ongelooflike goeie boodskap vir hulle gegee het. Na die troue



Alida Hendrina Magrieta Henning
***28-7-1945 wat op 19-6-2021 weens**
Covid-19 komplikasies gesterf het



a2.b7.c2.d3.e5.f2.g3. Pieter Emile
Henning *18-6-1943 is op 8 Augustus
2021 te Gonubie in Natal oorlede weens
Covid-19 komplikasies

kon hulle nie die nodige wettige dokumente vir 'n huwelik kry nie, want die staat het van die dokumente verander en almal wag toe vir die nuwes om te kom. Op die ou einde was al manier om die probleem op te los dat hulle weer in die hof moes trou!

Wicus en Mieke woon te Keetmanshoop. Sy het 'n Meestersgraad in Bedryfsingenieurswese en doen kontakwerk as 'n Bedryfsingenieur, terwyl Wicus 'n sakeman met 'n slagtery is, waar hy vee eers vetmaak voordat hy slag. Hy boer ook met varke.

Sterftes

Sedert die eerste Henning nuusbrieff in 1985 het ons probeer om oor sterfgevallen onder die Henning familie te berig. In hierdie nuusbrieff – nr 148 – rapporteer ons oor 'n rekord getal sterfgevallen en die Covid-19 pandemie was hoofsaaklik daarvoor verantwoordelik.

Alida Hendrina Magrieta Henning wat op 28 Julie 1945 te Vereeniging gebore is, is oorlede op 19 Junie 2021, ook te Vereeniging. Sy het 'n paar dae voor haar dood geval en haar been gebreek. In die hospitaal het hulle agtergekom dat sy Covid-19 onderlede het, waaraan sy uiteindelik dood is.

Alida Hendrina Magrieta Henning se nooiensvan was ook Henning en toe trou sy ook met 'n Henning. Haar nooiensvan genealogiese nommer was a2 b6.c1.d5.e1.f2. g1.h9. terwyl haar man, Daniël Albertus Cornelius Henning se genealogiese nommer a2.b1.c6.d8.e8.f6. was. Sy en haar man het twee kinders, Hendrina Jacoba van der Walt (gebore Henning) *23-1-1966 en Johannes Stephanus Henning, *4-8-1969

a2.b7.c2.d3.e5.f2.g3. Pieter Emile Henning *18-6-1943 is op 8 Augustus

2021 te Gonubie in Natal oorlede weens Covid-19 komplikasies.


Pieter was in die beginjare van die Henning Familiebond een van ons steunpillare en het vir etlike jare op die eerste bestuur van die familiebond gedien. Met die stigting van die familiebond het ons 'n werkgroep aangewys om 'n wapen vir die familiebond (inderwaarheid vir die Henning familie) te ontwerp, het Pieter vlytig deelgeneem en met talle voorstelle (bykans 100) vorendag gekom. Uiteindelik het ons een van sy voorstelle aanvaar en by die Staatsheraldikus vir goedkeuring ingedien. Dit is die wapen wat ons vandag nog gebruik. Ons kan dus sê dat hierdie wapen Pieter se baba was.

Oor die afgelope klompie jare het Pieter egter 'n alleenloper geword wat begin rondswerf het, maar ons het wel met whatsapp kontak gehou. Ek was op daardie stadium nog onder die indruk dat hy te Stilfontein gewoon het, waar hy bestuurder by 'n ouetehuis op die dorp was.

Van die begin van Augustus af het ek agtergekom dat hy nie meer my whatsapp oopmaak nie. In die tweede week van Augustus kry ek 'n E-Pos van Marthinus Henning van Welkom ('n kleinneef van Pieter) en hy sê dat hy ook nie reaksie op sy whatsapp kry nie. Marthinus het gelukkig kontak met Pieter se suster, Antoinette Krull wat in Gonubie woon en hy skakel haar. Toe verneem hy die droewe nuus dat Pieter op 8 Augustus 2021 in die Gonubie hospitaal oorlede is weens Covid-19 komplikasies. Hy was vir twee dae in die hospitaal toe al sy organe ingegee het.

Pieter het gedurende Oktober 2020 vanaf Stilfontein na Gonubie getrek waar hy by sy suster, Antoinette gaan woon het. Toe Marthinus met Antoinette gepraat het, het syself ook Covid-19 onder lede gehad. Omdat sy nie Pieter se selfoon se pin gehad het nie, kon sy niemand op sy adreslys van sy dood laat weet het nie.

Pieter en sy gewese vrou het slegs een seun, Matthew, wat êrens in Engeland woon.



b1.c3.d7.e9.f6.g1. Hester Sophia Henning, gebore 31 Desember 1951 sterf op 1 Augustus 2021, ook weens Covid-19 komplikasies

Met die afsterwe van Pieter, leef nog net drie van die oorspronklike nege lede van die eerste bestuurskomitee van die familiebond — ekself (Olivier Henning), Dr Nico Henning van Lyttelton-Manor, Centurion en Stanley Henning van Wierdarpark, Centurion.

b1.c3.d7.e9.f6.g1.Hester Sophia Henning, gebore 31 Desember 1951 sterf op 1 Augustus 2021, ook weens Covid-19 komplikasies.

Hester was vanaf die stigting van die Henning Familiebond in 1984 een van ons staatmakers en het selfs in 1992 saam met Bondsekreteraris Olivier Henning en sy vrou Charlotte vir vyf weke lank met 'n autovilla deur Europa getoer, waar ons Hester baie goed leer ken het. Sy het juis die paar dae wat ons in Lippstadt,

Duitsland, die geboortedorp van die Henning stamvader, Peter Henrich Henning deurgebring het, baie geniet.

Na voltooiing van haar skoolopleiding begin Hester in 1970 met haar studies vir die graad BA by die Onderwyskollege in Pretoria. Na 'n vinnige draai by die Staatsdiens, begin sy werk by die NG Kerkboekhandel in Pretoria. Mettertyd word sy aangestel as bestuurder van die tak te Middelburg, Tvl en die Brixtontak, Johannesburg. Na dertien en 'n half jaar by die Boekhandel begin sy werk by die SAUK in die oorklankingsafdeling waar buitelandse TV programme (hoofsaaklik Europees) in Afrikaans oorgeklank word. Hester was baie betrokke by kerkjeug-aksies en die Voortrekkers.

Haar suster, Helena se dogter, Idelette het vir ons 'n huldeblyk oor haar tannie Hester geskryf.

Haar familie sal haar onthou as 'n dierbare, sterk vrou vol lewe, liefde, lag en moed. Sy het al haar mense altyd bederf met gepaste geskenke vir verjaarsdae of sommer enige geleentheid. Sy was buitengewoon kreatief en het haar hele hart ingesit om take met baie sorg en detail aan te pak. Hester was geweldig lief vir die natuur en baie kundig oor plante en voëls. So het sy die vinke in haar tuin se broeipatrone vir jare dopgehou en gedokumenteer. Haar tuin was pragtig versorg en mens kon in elke seisoen vrugte pluk of groente uithaal.

Sy was 'n toegewyde Voortrekker en later ook kommandant van 'n kommando. Ek glo dis waar sy baie van haar truuks geleer en gedeel het. Sy het ure se stories vertel oor Voortrekkerkampe waarop sy gekook, gewerk en kentekens aangebied het.

As voormalige taalversorger en vertaler van tv programme vir die SAUK, was sy ook sterk taalkundig en kon mens haar enige tyd vra vir die regte Afrikaanse woord vir 'n ding. Sy was 'n streng organiseerder by die werk, want dinge moes reg wees! Maar sy was goed in haar werk en het 'n waardevolle impak op haar kollegas gehad.

Dan was sy boonop 'n bobaas kok, spysenier en bakster van kampioen vrugtekoeke. Sy hou ook menigte titels vir die beste potjiekos by kompetisies. Haar versierings, die dek van tafels en aanbidding van kos was keurig en altyd iets wat jou oog gevang het. Een van haar ander gunsteling tydverdrywe was om te lê en lees met haar kat op haar skoot.

Sy was 'n vrou wat eerder oor oplossings as probleme gepraat het en altyd met goeie raad en bereidwilligheid haar hulp aangebied het. 'n Vrou met 'n plan, want geen taak of uitdaging was ooit te groot vir haar nie. Ons gaan haar baie mis!

Sy het gedurende April 2021 Guillian Barré sindroom opgedoen . Op die ou end was haar lyf te swak om daarteen te veg. Sy het langer as twintig jaar te Greymont, Johannesburg gewoon.

Ons goeie vriend, **a2.b6.c4.d1.e5.f0.g6 Mauritz Martin Henning** van Theresapark, Pretoria-Noord het laat weet dat sy kleinseun, Shaun William Page [seun van Gerald Page en sy vrou Martha Magdalena (noemnaam Marlene)(gebore Henning)] se vrou tjie, Bernadette *9-6-1972 op 23 Julie 2021 oorlede is.

Bernadette was vir baie lank met Covid in die hospitaal maar het die dag voor sy huistoe sou gaan 'n terugslag gekry en is weer in die Intensiewesorgeenheid (ISE) opgeneem maar het dit nie gemaak nie. Shaun se ma, Marlene het vir ons hierdie mooi huldeblyk geskryf:

Shaun is 'n IT-Tegnikus en Bernadette was 'n sekretaresse, maar vanaf 2012 'n huisvrouw. Hulle het in Polokwane gewoon. Ons deel graag hulle liefdes- en lewensverhaal met die lesers van Ons Haantjie:

Shaun en Bernadette ontmoet mekaar by die Methodiste Kerk in Polokwane in 2007/2008. Albei sing in die Kerk se sanggroep wat Sondag-aande tydens dienste optree. Shaun speel ook kitaar in die groep. Hulle is eers net vriende wat baie bymekaar kuier en nagte om gesels;

Bernadette was tien jaar ouer as Shaun. Hulle raak verlief en hy kom vra sy ouers of hulle beswaar sal hê teen die verhouding as gevolg van die oudtdomsverskil. Natuurlik het Gerald en Marlene geen beswaar gehad nie. Hulle kon sien dat die twee jongmense baie lief vir mekaar was mooi by mekaar aangepas het. Bernadette was een van min mense wat Shaun werklik verstaan het. Sy was voorheen getroud maar het geen kinders gehad nie.

Hulle trou op 7 Julie 2010. Shaun was 27 en Bernadette 37. Hulle probeer nie dadelik om kinders te kry nie en het eers 'n ruk gewag. Sy raak swanger op ouderdom 39, maar verloor ongelukkig die baba. Sy raak daarna weer swanger, maar kry ongelukkig weer 'n miskraam. Hulle dink dat kinders nie vir hulle beskore is nie. Albei wil vreeslik graag kinders hê. Shaun wou vreeslik graag 'n dogtertjie gehad het.



Shaun en Bernadette Page en hul dogtertjie Shalene. Bernadette sterf weens Covid-19 komplikasies

Op 26 Desember 2012 kom hulle terug van 'n familie-kuier in Warmbad en is hulle in 'n aaklige motorongeluk by Ysterberg tussen Pietersburg en Potgietersrus. Dit het liggies gereën. 'n Opgewarmde BMW bestuur deur 'n jong man ry in hulle vas van voor-af. Die BMW jaag en gly op die nat pad en ry in hulle baan en bots kop-aan-kop met hulle voertuig. Die BMW breek in twee dele, die bestuurder van die BMW kom niks oor nie. Bernadette het hulle voertuig bestuur en word vasgepen agter die stuurwiel. Sy moes fisies uit die voertuig uitgesny word. Sy kry baie seer en daar is sprake dat haar been afgesit sou word. Sy word opgeneem in die


Medi-Kliniek in Polokwane en kry 'n nood-operasie die nag van die botsing. Sy is lank in die ISE onder sedasie;

Nadat sy ontslaan is versorg Shaun haar. Sy lê in 'n hospitaal-bed in hulle sitkamer by hulle meenthuis. Sy word stadig beter maar kan nie weer op haar eie loop nie. Sy is die meeste van die tyd in 'n rolstoel en loop met die hulp van 'n walker. Uit die bloute verwag sy weer! Op 43! Almal wat vir hulle lief was, was maar bang dat hierdie swangerskap ook nie gaan hou nie, maar alles verloop goed en 'n pragtige dogtertjie word op 4 April 2017 gebore. Sy word Shalene genoem – die “Sha” deel van haar naam vir haar Pa Shaun en “Lene” deel vir haar

Ouma Marlene. Vir die hele familie is sy werklik 'n klein wonderwerkjie en groot geskenk van die Here af.

Bernadette kry Covid-19 in Junie 2021. Sy word op 27 Junie in die hospitaal opgeneem, nadat sy sukkel om asem te haal. Sy word oorgeplaas na die ISE en bly daar vir 13 dae. Sy word daarna oorgeplaas na 'n gewone saal maar na twee dae het sy 'n terugslag en word teruggeplaas na ISE. Ongelukkig vererger haar toestand as gevolg van 'n bloedklont en 'n long-infeksie en onderliggende siektes as gevolg van die ongeluk en sterf op die 23ste Julie 2021.

Shaun is nou alleen-ouer van Shalene wat 4 jaar oud is. Hy en Bernadette se geloof was baie sterk en het geglo dat die Here in beheer van hulle lewens was en dat die Here hulle elf wonderlike jare saam gegee het.



Japie van Wyk *9-6-1935, eggenoot van a2.b6.c1.d3.e5.f1.g8. Petra Henning *10-4-1938. Hy was 'n minister in die Ou Suid-Afrika en sterf ook weens Covid-19 komplikasies

Jacob Albertus van Wyk gebore 9-6-1935 was die eggenoot van a2.b6.c1.d3.e5.f1.g8. Petra Henning gebore 10-4-1938. Japie sterf op 30 Julie 2021 weens Covid-19 komplikasies. Hy het langs die Oranjerivier grootgeword en op 'n besproeiingsplaas, Kayalami, in Grootdrink, ongeveer 75 km vanaf Upington geboer.

Hy het verskeie leiersposisies in die landbou en veral die wynbedryf bekleed. Hy het in die direksie van die KWV gedien en was voorsitter van die Oranjerivier wynkelder.

Hy word gedurende 1981 die parlamentslid vir die kiesafdeling Gordonia. Gedurende 1986 word hy deur Staatspresident PW Botha aangestel as Adjunk-minister van Waterwese. Mettertyd word die adjunk-ministersportefeuljes van Grondsake en Finansies bygevoeg. Hy word gedurende 1993 deur Staatspresident FW De Klerk as Minister van Omgewingsake en

Waterwese aangestel en dien tot April 1994 toe die ANC die regering van Suid-Afrika oorgeneem het.

Hy was nog heeltemal gesond toe die virus hom platgetrek het en het tot op die einde op sy plaas, Kayalami in Grootdrink, geboer.

b1.c3.d2.e2.f1.g1.h6. Daniel Henning *26-12-1949. Ons het vemeem van die afsterwe van Danie Henning van Schloss Gelande 5, Jan Fiskaalstr 1, Culemborg-park, Randfontein wat op 23 Junie 2021 gesterf het. Ongelukkig kon ons geen verdere besonderhede verkry nie.



Hy was getroud met Hester Maria (gebore Kasselman). Hulle het twee dogters: Estelle en Laurette

b1.c3.d2.e2.f1.g1.h6. Danie Henning *26-12-1949, sy vrou Hester Maria (gebore Kasselman) en hul twee dogters, Estelle en Laurette. Hy sterf op 23 Junie 2021

a2.b5.c4.d4.e2.f9.g1. Frans Engelbertus Henning * 4-3-1935 van Kaallaagtestr 1462, East-Lynn, Pretoria wat op 29 Maart 2021 in die ouderdom van 86 jaar oorlede is. Ons kon ook geen verdere besonderhede oor sy sterfte in die hande kry nie. Hy en sy vrou, Cecelia Johanna (gebore O'Regan) het twee kinders: Etienne Turner Henning *25-6-1966 en Brenda Stofberg (gebore Henning) *23-4-1968. Ongelukkig het ons nie 'n foto van hom nie.

a2.b6.c4.d3.e7.f6.g2. Johannes Christiaan Henning gebore 4 September 1950 is op 22 Junie 2021 oorlede aan Covid-19. Sy bynaam was Koos of Flooi. Flooi was getroud met Hester Florina (gebore Van der Walt) en hulle het twee kinders, Nerina Erasmus (gebore Henning) *11-12-1981 en Martin Henning *29-4-1984. Martin het belowe om vir ons iets oor sy pa te skryf en vir ons 'n foto van sy pa te stuur, maar ongelukkig het dit ons nog nie bereik nie.

Ons het ook verneem dat een van Flooi se susters ook op 17 Aug 2021 oorlede is, maar kon geen verdere besonderhede kry nie.

Ons het in 'n boedelkennisgewing in die koerant Beeld kennis geneem van die afsterwe van **Anna-Lize Henning *19-9-1985** van Friedastr 604, Daspoort, Pretoria wat op 3 November 2020 oorlede is. Ongelukkig het ons haar nog nie op rekord nie en weet dus nie waar sy in die Henning Famileiekroniek inpas nie.



Suid-Afrika se Davisbekergroep. Agter: Philip Henning, Lleyton Cronje, Ruan Roelofse en Siphon Montsi. Voor: Raven Klaasen, Christo van Rensburg en Lloyd Harris

Philip Henning speel Davisbeker vir SA

a2.b7.c7.d10.e3.f1.g2.h1. Philip Henning (20) wat tans 'n student aan die Universiteit van Georgia in die VSA is, is oorspronklik van Bloemfontein en word as een van blinkste opkomende sterre in die Suid-Afrikaanse tennis arsenaal beskou. Hy het in 2018 as tiener speelkans gekry in 'n Davisbeker Groep 2 wedstryd teen Portugal in Lissabon en was ook in die groep vir

die wedstryd teen Israel. In 2019 het hy sy eerste wedstryd in die kleure van Suid-Afrika teen Bulgarye in Kaapstad gewen.

Hy het nou op 18 September 2021 in die Davisbeker Groep 2 kragmeting teen Venezuela as Suid-Afrika se nr 2 speler speelkans gekry. Dit was die eerste keer dat hy in een van die eerste twee enkelspelwedstryde gespeel het. Sy vorige twee wedstryde was in die vierde en vyfde rondes. Lloyd Harris was Suid-Afrika nommer 1 speler. Raven Klaasen en Ruan Roelofse was gekies as Dubbelspelpaar. Philip het sy wedstryd teen Venezuela se nr 1 speler, Ricardo Rodriques met 6-4, 6-4 geklop. Uiteindelik het Suid-Afrika met 4 – 0 gewen en sal nou in die uitspeelwedstryde vir promovering na Groep 1 speel.



Geldsake

Baie dankie aan ondergemelde lede wat gereeld maandeliks per debietorder 'n bydrae vir die familiebond aanstuur. Dit is van onskatbare waarde:

Jan Hendrik Henning van Glenstantia, Pretoria, Mauritz Martin Henning van Theresapark, Pretoria-Noord, mev Gesina Spangenberg van Tsumeb, Namibië, mev Runa (R T) van Straaten van Pretoriuspark, Pretoria en Pastoor Antonie Henning van Daspoort, Pretoria.

Dan het die volgende persone oor die afgelope drie maande ook waardevolle bydraes gelever waarvoor ons baie dankbaar is:

- Gert Hendrik Frans Henning *6-5-1971 en sy vrou, Grietha van Bethlehem. Ook nou maandeliks R200.00
- Ds Bjarne Fowels van Hjelmeland, Noorweë R2000.00 (R1835.00)
- G S (Giep) Henning van Strand - R500.00
- Dr M E J (Tjol) Henning van Lyttelton-Manor, Centurion - 500.00
- Mev Marlene (M M) Page gebore Henning van Pietersburg (Polokwane) -R300.00

Alle bydraes word verwelkom, want dit wys vir ons dat hierdie lede waardering

het vir die werk wat die familiebond doen.

Die bank besonderhede van die Henning Familiebond is as volg:

FNB, Villiersdorp (tak 200 712); Rekening nr 6265 7601 483. Gebruik asseblief u lid nommer of voorletters en van (indien moontlik volle voorname) as verwysing wie die deposito gemaak het.